

Interview met.....

[Jubileum: 50 jaor rapido](#) >> [Jubileumjaar](#)



Stel dich efkes veur:

Miene naam is Claar Boots-Hinssen en ik bin al 37 jaor getrouwd met Ton en mooder van Kim. 17 Jaor heb ik gewerk beej Scheidegger Opleidinge en noow heb ik al diek 3 jaor un keileuke full-time baan beej tandartsepraktijk Kies Mondzorg in Blièrick aan de balie.

Wannièr waasse lid van Rapido en wielang bisse det gewaes:

Ik bin in 1989 lid gewaore van Rapido en bin d'r in 2007 noëdgedwonge mei môtte stoppe i.v.m. pien aan de rök.

Daobeej noome mien hobby's auk erg vuel tièd in beslaag.

Waas ut nog leuk nao Rapido:

Netuurlik velse metein in un enorm gaat asse beej Rapido vertreks.

Ik môt ièrliek zegge det ut mich hièl vuel meujte gekos haet um mich daoreuver haer te zette. Det is oètintelik gelök door euveral aan mei te doon waat op miene paad kwaam.

Maar.....ut gemis blièf altièd!

Waat is de leukste of vervaelendste herinnering die se hebs oèt diene Rapidotièd:

Mien herinneringe aan Rapido zien euverwaegend leuk.

Ut waar dônnerdaags'aoves altièd gezellig op de bank tot ut moment desse umgerope woors um te gaon speule.

Det waar sôms erg vervaelend. Zootse midde in ein good gesprek, meusse dich weer oppakke en probere te winne.

De wickendjes ware altièd erg amuzant behalve die verschrikkelikke verkleipartièje die dao altièd aan te pas kwame.

En dan die stômme spelkes die we meuste doon.

De wits zeker desse alles good hebs gedaon en toch hadse neet gewônne door det gegoochel met die punte altièd.

Ik kin nog link waere as ik dao aan dink! Det waar meystal erg frustrerend.

Welke sport duisse noow en waat zien dien hobby's:

Ech sporte doon ik neet mièr. Ik wandel gaer, as den tièd ut toeluèt tenminste.

Det vind ik heerlik, lekker òntspanne laupe en gezônd bezig zien.

Mien hobby's zien d'r eigelik te vuel um op te neume:

Ik zing beej ut Venloos Vocaal Ensemble.

Bin lid van Volkstheater Frans Boermans.

Speul Mieke Maos beej Cafe Chantant.

Staon same met mien schoënzuske op de buhne as "De ingezônde stökke".

We haole de männer d'r ens lekker door, die rol is prachtig um te doon.

In ut dageliks laeve zoel ik det neet dörve !

Ik heb met verschillende venlose revues meigedaon en bin netuurlik erg aktief waat betref de vastelaovend met zinge, buutte, sjurere enz.



Waal moëj um te vermelde is det ik jaorelangk vastelaovesleedjes heb gezônge same met Hay Crompvoets.

Hay is helaas vurrig jaor gestorve en als ode aan Hay is d'r un CD oètgebrach wao hae zelf 6 leedjes zingk en ut 7e leedje is speciaal veur um geschreve door Frans Pollux en det moch ik inzinge. Un ièr um te doon veur zónne unieke vastelaoveszenger.

Waat waas tot noow toe diene grutste kick:

Um met "de Kallebeskes "of noow met "de ingezônde stökke" op de buhne te staon en de minse met ózze flauwe kôl aan ut lache te make..

Geisse gaer op vakantie en welke plek haet dien veurkeur.

Ik gaon gaer op vakantie maar neet te wièd.

Ton en ik gaon gaer met de sleurhut op paad zônder un bepaold doel.

Weej risservere noëts maar gaon op de bonnefooi.

Vruuger trokke we meestal naor Zuud-Frankrièk of naor Italië.

Sinds Ton ut aan ut hert haet zeuke we de wermte nimmer op.

We hebbe in Pruusses prachtige plaetskes ôntdek en die ligge d'r nog genôg.

Vlege, dao bin ik neet kapot van. As ózzen leeven Hièr had gewild det ik zoel vlege had dae mich waal vleugels gegeave toch.....?

Op welke plek môsse volges dich eine kièr in dien laeve gewaes zien:

Met vastelaovend in Venlo netuurlik!!

Met wae zoelse unne kièr un beschuutje wille aete of 24 oor door wille bringe en waarom:

Met George Clooney, want dae kin beej det beschuutje in idder geval un lekkere tas kôffie

zette.

Met daezelfde George Clooney zoel ik bes 24 oor door wille bringe want ik zoel ens wille weite of dae neet allein aan d'n boètekant moëj is maar.....

Wao hebse unne groëte haekel aan en waarom:

Ik heb unne godsgruwelikken haekel aan poetse want det is ut meis ôndankbare werk waat d'r is.

Zanikers en greeke kriège beej mich auk de gael kaart, want die verpeste neet allein eur eige laeve, maar auk det van de minse um eur haer.

Daobeej zien det meestal dezelfde luuj die everal kritiek op hebbe en zelf noëts waat doon.

Hebs dich un laevesmotto en waat is det:

Mien motto waas en is nog altièd:

UT LAEVE IS EIN FEESJE,

MAAR DE MÔS WAAL ZELF DE SLINGERS OPHANGE!

Dus ----- máak d'r waat van.

Hebse nog iets op te biechte, doot det dan noow (we vertelle ut neet vaerder)

Messchien kin ik noow dan intelik opbiechte det ik beej de knobeltochte van Rapido waal ens gefoèteld heb.

Ut haet neet meuge bate want ut haet mich noëts un euverwinning gebrach.

Wie is det spraekwoord auk al weer: Ièrlikheid deurt.....wie lang?

Waoreuver wilse nog waat kwièt:

Waat ik zeker nog kwièt wil is det ik Rapido unne opstaeker wil gaeve veur de klupgeis dae dao heers.

Ik bin d'r altièd met hiël vuel plezeer haer gegaon en kièk dao met aevvuel plezeer op truuk.

Veural de kèrtrekkers, die toch altièd weer idderein weite te motivere um mei te doon met allerhande flauwe köl, verdeene un medalje.

Sjapoo !!!



Elly van Elswijk

Commentaren

Claar Boots door Guest op 26-02-2010 om 21:03

Harstikke leuk dit ônderdeel. As Claar d'n toën haet gezatte veur de vollegende kinne we nog waal leuke dinger verwachte.

Gank zoë door.

Groetjes,

Rob Doesborg

Claar door N. Timmermans-Winter op 10-03-2010 om 19:59

Leuk te "huüere" en te "zeen" wie ut geit met die ald-leeje.

Heej kinne weej allemaol wat van liëre, veur as weej straks auk ens neet mier speule.

Asse ein paar jaor beej ein bedriëf haes gewerk en de geis in de vut, kriegse dao meestal eine cursus: "Watnutedoen" aangebaoje.

Blij te weite det ut Claar good geit en det hét ôs mis, wie weej um.

Nell.